

曾忠襄公書札

曾忠襄公書札

卷之八目錄

復王峯臣

致駱宮保

復郭筠仙

復李季荃

復易紫橋

復毛制軍

復李季荃

致黃南坡

復趙玉班

復金眉生

復程方忠

致趙玉班

復張岷堂

復趙玉班

致左季高制軍

致惲次山中丞

復鮑春霆

復鮑春霆

復鮑春霆

復富治安將軍

致駱制軍

復官中堂

致李少泉中丞

致劉印渠中丞

致官中堂

復郭筠仙中丞

復楊厚菴

致李季荃

復吳竹莊

復官中堂

復惲次山中丞

復蔡少彭

復郭筠仙中丞

致蔡少彭

復郭意誠

復郭意誠

復惲次山中丞

致李少泉中丞

致李少泉中丞

復黃澤生

致李少泉中丞

復郭意誠

復丁雨生

復富治安將軍

復官中堂

復竇蘭泉

復萬箴軒

復劉罔卿

復李少泉中丞

復李次青

復惲次山中丞

復李壬叔

復劉省山

復趙惠甫

復陳舫仙

復陳舫仙

復何筱宋中丞

復王壬秋

復唐義渠

復翁玉夫

復李子和

復朱星檻

復趙初賓

致郭子美

復鮑春霆

復郭子美

曾忠襄公書札卷八

復王峯臣

頃展惠牋具悉一切敝軍五月閒所開地道至十一月功在垂成詎該逆於城之內外牆腳對開地道已將穿透勢不能待橫道齊整因急於初五日裝藥四萬夜閒封塞道口並派隊四面環攻於五更時轟之其時浮橋搭成城塌之處其寬雖十餘丈而兩頭壁立無斜磴可上竇緣城身厚有八丈火藥僅轟塌外面三四丈而已其內面仍然巍峙故賊得以堵禦搶口之賊被磚石土塊擊傷者甚眾而兄營將士馳過浮橋爭先搶口城上大礮洋鎗子如雨注受傷陣亡者亦有三百餘人人謀之不能

遽成殆有天意可勝喟然蘇城已於十月二十五日克復少荃
中丞已進攻無錫矣知關廛注並以奉聞

致駱宮保

日前肅泐蕪函備陳懇款諒可馳達典籤敝軍新募之勇陸續
到齊已分撥老營進紮龍膊子地面頗爲扼要但能堅持數月
並力圍攻困獸諒亦難久踞惟各營口糧積欠二百萬益以新
軍月需更鉅竭蹶更甚嚴冬奇冷嗷嗷數萬人露蓆風雪中饑
寒交迫歲前萬難勉支前懇師門曲鑒窘急之狀先於今冬籌
撥四萬兩以應眉急俟捐數收齊卽請劃扣定荷鴻慈俯允茲
復瑣瑣瀆陳者實緣頓兵兩載甫值合圍緊要之時四顧傍徨

無以爲計惟有懇求師門予以一綫生路故不覺陳乞之至於再三也苗逆脅從各圩不堪搜括反戈攻之臨淮各軍乘勢分攻下蔡潁上正陽蒙城業已解圍倘各路均能得手即可進取老巢殲此巨猾知關盡注謹以附聞

復郭筠仙

初九日肅佈一函計達台覽頃奉九月二十二日手示敬承親切老兄之學問經濟非下走所能測其萬一前書所云不過聊效野人獻曝之忱乃蒙虛懷嘉納休休有容仰見好問察言集思廣益之盛德佩服無量高州以招撫訖事兩帥下車之始威望有以懾之也惟地方之民情風俗如此非得賢牧令潛移默

化無以善其後想老兄接見屬僚必有以甄陶而慎使之舉錯
宜則民心服邳隆之化可計日而待也庫藏之窮殊出意外釐
捐歸本省清釐洵恐利柄一移則江南之餉仍成畫餅不若劃
然兩段但思所以整頓之庶幾滴滴歸源日有起色耳承札提
正款代購洋礮感甚感甚南叟已抵泰州眉生決不赴粵以何
小宋馮展雲等急欲傾之恐反爲大賢之累耳岷堂經理西鹽
長公頗信任之必可得力李戴二將承厚資遣回感謝之至此
間於十五日派蕭信卿軍門率六營紫鍾山一帶新募各營則
暫紮內濠以資訓練惟兵多餉絀殊深焦灼想公與寄帥必有
以援我耳

復李季荃

接冬月二十一夜手畢具悉進兵蘭陵軍勢極順現已逼攻城根賊情渙散循覽之下額手欣慶平吳之功賢昆季實身任之此時定卜堅城已下捷書之至翹企而待金陵漸作合圍之勢而東北太平門尙無人扼紮城逆自忠酋至後死黨益多守志益切力攻之外無可希冀前日溧水城外爲賊鋒竄擾幸王峯臣在彼堅守仍使挫衄而返聞城內蓄力數日欲從七甕橋一帶截我長圍當必有一番惡戰但各軍食乏多以稀糜度日枵腹從事爲可慮耳來函以成功期之歲內用特覲縷及此恐饑疲之士不足圖功以副盼望耳

復易紫橋

接初二日惠示知雄師分扼溪旌力防要隘老罷當道重鎮屹然甚慰甚慰軍行以糧道爲最要旌防轉運不易查梅溪河直達縣城想係隆冬水涸之故未審入春水漲能容數百石之舟否孝豐一帶賊踪不靖浙軍聚攻省會未必分力及此惟甯郡爲賊出入要地頃據李中丞來信探得賊於句容溧陽廣德三邑要隘處處設守爲他日南竄之計如是則甯郡各邑首當其衝惟望嚴密防範時常偵探是爲至要耳溧水前次賊擾幸峯臣陞字營力擊卻去現在句容之賊守城賊均無動靜風聞製造火龍攻具意圖不久想有一戰也

復毛制軍

差弁回營得奉惠函知秋末數函陸續均到並諭風聲所播寇盜全消民解倒懸脅從罔治復荷出其餘力留師以枚楚邊節麾甫莅新治蒙休羽檄一傳舊疆受福恢恢游認令人禱佩無已粵中民風勁悍習氣最深虛矯之情中空無實雄師掃蕩既怵之以聲威而台端治尙樸誠針孔相投尤爲對症之藥指顧之間定見風移俗換耳空乏之故或者前人開源節流未盡精妙民悍則加科不易俗傷則經用必繁以情度之料不外此閣下與筠帥下車未久自不能驟求速效一俟審量旣明隨時酌劑安見此邦瓊玉不可復收之天府耶釋氏之言有云貧子囊

珠而忘其當蓋徐索之可矣前籌固本一疏實天地間有數文字至誠之言流自肺腑雖欲弗聽其能之乎弟前所陳言見理既不甚真修辭亦未盡善其不奉 俞固宜重見慰藉益用汗顏至勉之以人事君之義不可倦於求賢弟雖已無其事要之拳拳此心不敢或泯敬再拜稽首師公昌言南老下游一行殊爲興索昨過此小泊已復旋皖聞以祖墓卜遷之事尙當來此料理完竣後再返惟老懷經此波折未免略頽粵東之行未可決矣秣城軍務阻滯如故城逆深潛不出援賊亦遙遙作勢不來相逼觀此堅城猛攻無益惟有圖合圍以俟其糧絕之一計顧新軍雖集尙缺一隅收功之望尙不知在何日也礮位購齊

諸費鼎力叨在知愛不以虛辭相謝矣

復李季荃

展奉環章得悉常郡經督軍進逼已圍五門奔牛之捷斬獲無算並生擒洋人足令陸贄水慄從此乘勝進取直下毘陵計上元張宴之時當是甘泉奏捷之日忭頌奚如兄軍次金陵久攻不下昨得諜報溧陽侍逆一股圖竄江西前隊係粵東人行至廣德有去逆效順反戈相攻之說果爾又翦去一羽翼矣此間數十里外羣盜如毛與丹句之賊互爲犄角以援應老巢忠貞曰伺我軍之懈以圖一逞幸各營防範甚嚴密也現擬調軍扼紮神策門杜其深宵偷越因連日雨雪礙難移動一俟晴霽卽

當親往相度布置惟合圍之後跋浪長鯨負嵎猛虎衝突在所不免二三月間必有幾番鏖戰當激勵將士以待之耳

致黃南坡

客臘肅佈一牋諒呈清睽金陵負嵎如故弟於燈節後陸續分布各營扼紮神策門一路城逆見我軍圍偏漸緊二十一日忠逆指揮馬步賊數千人猛撲龍膊子營壘爲背城借一之計我軍出隊鏖戰斬首數百人賊尙奮力撐拒乃分兩路鈔襲之鎗礮齊施擊斃黃衣騎賊數十人步賊七八百人賊勢不支而進城之路已被我軍攔截羣向鍾山頂上石壘中狂奔此壘賊名爲天保城踞險憑高屢攻未破是日乘勝窮追直薄其壘環攻

一時之久軍士從礮子中攀崖附壁而登遂將石壘攻克賊無
脫者當卽分兵守之昨日親往周覽形勢此壘屹立山嶺爲石
城東北之屏蔽幸而克之俯瞰城內瞭如指掌虜在吾目中矣
神策太平門布置將畢業經合圍賊勢愈蹙連日城中逃出難
民已過萬餘均供稱逆糧漸罄斗米須五六十錢據目前光景
度之春夏之交定有可望之機也尊意前擬克城後諏吉遷葬
刻下各軍移營進紮直逼城闌寶塋已爲乾淨土城逆踪跡所
不及大可趁此時駕臨料理或者福星所蒞親見虎穴之平弟
亦得暢聆塵譚藉抒饑渴愉快如何

復趙玉班

二十七日肅佈寸牋諒可郵呈記室頃奉正月二十二日環翰敬諭台旌蒞省後蠶躬尙未大安靜攝旬餘始臻平復春風多厲王事賢勞尙祈勉愼起居是爲至祝沅華土匪一經嚴拿聞風駭散遏亂機於甫肇枌榆父老風鶴無驚皆當道暨閣下先事彈治之力也意翁偶患頭風不日定已霍然矣南翁大有歸山之意家兄留之主持鹺政刻下已由皖垣上駛手書已由驛遞皖轉寄矣霞仙中丞新正來面謂分三路進兵徑規褒沔所募湘士業經整旅啟行兵力旣增指揮得以如意且因餉糈支絀舉行屯田爲經久計西陲多事得此君慘淡經營當可化崎嶇爲康莊也浙西集蘇浙之兵會同進剿杭嘉屬邑次第納款

浙垣蘇郡亮可刻日盪平宜興溧陽已經蘇軍克復矣金陵自合圍太平神策門後賊吮已斷附城各營每夜聞城內譁擾聲達旦不休據逃出難民供稱城逆奪糧自相殘殺似此光景內訌之勢漸成初七初八激勵將士併力環攻初八夜已有用梯登陴者十數人奈礮火太多未能得手所幸傷亡亦不過數十人而已近日擬仍攻堅以驚擾之使之有向順之機不知能如願否也前月之初東路之賊竄往徽州經皖南諸軍擊退刻已繞浙境上竄玉山將繞信豐一帶若彼處之兵不能堵截深恐闌入江西腹地蔓延不能速了也聞之焦灼敝軍火藥蒙中丞公源源接濟感甚感甚米捐一節重費盡籌既有黔滇之捷徑

允賴閣下鼓舞盡神尊見慮緩不濟急商請中丞墊銀買運而以捐數歸還全軍數萬竈得大君子一言而養命之原藉以不匱榮才之爲饑軍計者至矣比年東征一軍全仗中丞高誼諸君盛情隨所陳乞無不曲如其意非惓念大局而又愛弟之深者斷不能如是之維持挹注也銜戢如何可言黃游戎於敝處軍務卓著勤勞保晉一階分所應得俟克城後當遵指彙入也李泰山帶營尙能勝任惟祝其將利字看輕斯全才矣

復金眉生

頃專足遞到手函知旌從來往下河購辦米担月內卽至敝營良覲不遠甚慰甚慰皖中不偶曩固逆知其然人情之不同如

愈疾之藥寒熱溫涼緩急各異其能劑之得宜則相牽而得效合之太急則相戾而無功以閣下之明何獨不知第以關注殷拳急於改轍有不暇計耳而弟則年來閱歷差深知凡事自有水到渠成之理一切付之分定惟於摯愛之情則念念不去於懷初不以成敗利鈍爲之歧視也箴軒方伯聞曰內成行計到營之前可以一晤都帥先有調赴南岸之說而復奉命防守雲中想甘省逆獮復有猖獗之勢西北殷憂念之疾首金陵軍務自得僞天保城而合圍之師勢已聯絡初七夜督眾乘雨梯攻登陴已十餘人守賊大隊擁至抵死抗拒鎗礮如注後隊不得繼進所幸勇丁傷亡不過數十人差無大損現飭嚴圍以冀坐

斃第聞城中逆酋俱有積糧而裹脅之眾已多道殣更展一月則死者益不可計如何如何囑發護照遵卽照數繕寄並移會南北臺與常鎮道免釐矣

復程方忠

接讀來函知禾郡未能卽下轉損良將何安泰殊爲扼腕惟雄師甫進之時如疾雷破山已足以塞賊魄浮橋之不成雖由水師心力之不齊然亦遲速在天稔惡一日不盈逆穴一日不掃平心置之可矣承商示來此助剿一層極蒙關愛第少荃宮保以勦浙全軍屬之麾下軍情須臾不同賢友爲一方之統將擔當數百里之軍事安可舍之而西來乎彼此皆心心相印而事

與願違莫可遽然合併祇好徐徐待之且此閒情勢以理度之似有非旦夕所能了者或須麾下底定嘉湖之後還軍來此以擒巨憝耳敝軍自得鍾山要隘之後南北圍師已成一氣月初連日冒雨督攻並有可乘之機而竟未就益知遲速天也故節愈短勢愈險而轉以鎮定處之以冀萬全之效至於淹遲之責所不暇計亦以城大兵單中外必有能諒之者耳輪船通賊被獲殊大快事未知作何發落便祈見告爲幸

致趙玉班

初九日肅佈寸牋計徹清昧連日晴朗春和景明金陵合圍後負固依然初七夜之役迄無成功可勝焦灼現仍每日派隊以

蹙之轉瞬暮春不知卽有可乘之隙否餽餉羅掘俱窮值此米價翔貴士卒饑甚所幸軍餉兵米一節閣下竭力吹噓次山中丞慨許接濟恃此一綫生路尙可拊慰眾心忍饑以待耳上竄玉山之賊經韓席兩軍疊次擊賊餘孽尙徘徊鉛山金谿閒諒不至於滋蔓也漢中盜糧垂盡勢漸東趨霞仙中丞擬分路剿擊會師河南爲一鼓殲滅之計西北漸有轉機聞之愉快湘省仗諸君子幹濟桴鼓不驚而鄰境羣盜如毛黔中蹈藉尤甚將來越境進攻必須精良之火器弟軍年來頗得洋鎗之力臨陣施放尙能遠及茲特奉上單響洋鎗一千桿大銅帽二百萬顆以備攻剿鄰匪之用公文係咨解交次山中丞轉發也乞照收

爲荷

復張杞堂

頃展手書藉聆種切衛肇文所解之款業經到泰盡籌擬先買鹽四千引分爲兩批令衛倅鄭令陸續押運上駛雇配江船等事分歸各員料理甚善甚善水腳先付或五成或七成到漢應找之數亦請尊處酌定數目飭令押還委員帶往不必由督銷局劃撥以省轆轤此次兩批通計需銀三萬餘兩不敷之數於加成釐金內動撥已據萬方伯來牘允許矣弟處二批之二萬兩至今尙無款可湊殊爽前約愧甚愧甚然三月內必可湊來也總之均須揀買上色好鹽至湘乃可銷售衛肇文頗知湘岸

銷鹽情形祈面諭照式辦理庶免後來滯銷之患耳至要至懇
伯堅大令得委署沅陽甚好局中添員襄理葉大令老成穩練
熟諳鹺務札委隨辦甚好王子鑑願在裏下河採辦米担敝處
因別無款項可以按時給價深恐失信於商人是以不再以此
事付之也敝軍昨於朝陽神策等門及龍膊子一帶增修二十
餘壘爲開鑿地道計而距城七十餘丈弁勇受傷者極多養卹
無貲深以爲苦能否速成尙難豫定也嘉興郡已於前月十八
日克復程學啟受重傷不知可痊否鮑軍初七早克復句容如
乘勝進取金壇則妙矣南翁尙住此間順風乃可揚帆上皖閣
下在局公務冗忙目下不必上來且待克城後面商一切最爲

相宜知念奉聞

復趙玉班

前月杪裁答寸牋諒可郵達籤閣頃奉十九日環章沅龍各屬
匪徒續經飭弁捕獲要犯如薙毒草淨拔根株從茲永絕萌芽
矣黔中麋沸已甚湘省會剿李七一股軍抵黎平粵東亦率師
來會而李逆竄過黎境之北密邇靖邊幸令弟已統軍往堵琬
戈所指游氛立消埽蕩之勲可爲預券也鄂中裁撤勇丁譁聚
索餉幸已解散不至釀成釁端甚慰甚慰上竄江右之賊擾及
鉛山金溪此處直通閩省若閩軍能攔頭迎擊而豫章之師躡
勦於後可以聚而殲旃次山中丞檄募新軍預杜獯貊之窺伺
曾忠襄公書札卷八

自是至計而徵發之勞轉饋之繁擘畫已不遺餘力矣廣德踞
逆棄城退竄句容亦有乞降之說鮑軍門已抵句境或撫或剿
卽曰可期得手金陵負固依然日前派隊剗挖城根奈周垣疊
石堅牢輦如鐵甕無從著手現堅持圍局以待其糧罄但城中
徧地種麥一至成熟之期又延時日是以昨派各營增修二十
餘壘於神策門朝陽門龍膊子一帶爲開挖地道之計距城各
七八十丈受傷者多難奏旦夕之效令人悶甚然無可如何也
米捐賴蓋畫主持卽日舉辦藉造饑軍之命感激奚如南叟改
墳事已就緒近日卽可挂帆上駛知念並聞

致左制軍

日昨肅答寸牋諒可郵呈行幄頃接安慶來函欣諭雄師攻克
杭餘露布星馳朝野莫不額手稱慶回憶兩年前浙東西羣盜
如毛幾無一片乾淨土經我公慘淡經營節節掃蕩掣長鯨於
浙水除毒螫於武林省會旣平便如高屋建瓴從此移得勝之
師直下湖郡全越千餘里指擣大定正不獨彼都人士頌東南
之再造已也敬佩敬賀第一隅株守無術攻堅地道雖經開挖
而距城尙有六七丈能否鑿穿竟難預定對此堅城徒深愧憤
而已

致惲中丞

初八日肅佈一函諒可郵呈籤閣鮑軍於二十一日攻克金壇

杭州克復後逋城悍賊皆由浙竄皖大股已至徽甯屬境毛唐
二軍迎戰不利皖南駐防之師一挫休祁諸邑在在可虞若羣
賊全趨江西則完善之區又將蔓延無已餘燄復張聞之焦灼
殊甚東壩一路有鮑部譚鎮八營駐守諒可扼此要衝敝軍開
挖地道頗有爲水石所阻者一時難以告成過此以往恐城中
麥熟又可久延矣如何如何程學啟攻拔禾郡先登被創率以
三月初十日不起蘇軍失此良將可勝惋惜多禮堂將軍力攻
盤屋受傷甚重已將欽篆交穆都護此君乃西北長城惟祝調
治速痊勉支秦事則大局之幸耳

復鮑春霆

頃奉惠函悉旌麾已率精騎抵金壇城下該逆鼠伏不出而離
句容百餘里糧路甚遠丹陽援賊又屢撲官軍營盤尊意擬率
雄師助之安慶以東壩守兵單薄爲慮麾下已遣譚鎮及洪將
所部連前春宇三營合共八營往東壩調度駐守具紉布置周
詳佩慰曷極頃接吳竹莊觀察來函云湖州大股已竄至甯境
之胡樂司侍逆亦在其內勢頗猖獗東壩係上下游衝要之地
當此援賊麇至必須扼守萬全方不掣動大局云所見與麾下
安慶兩意相同安慶函牘均以句容東壩爲重是進取金壇與
助攻丹陽皆是題外之文矣馮軍門萃亭既有函求分兵助剿
丹陽或發兵去否仍求大才酌妥行之至於進取金壇之說似

宜緩辦蓋麾下所部已分布數百里不可又分一枝勦辦金壇也弟軍圍局依然現仍開挖地道不知將來有一成者否耳

復鮑春霆

頃奉捷書欣諭雄師擊敗金壇巨匪並常州退竄之賊擒斬甚多旌纛現駐金壇城外之西洋以勦截過境之逆賊威稜所震足摧霹靂金丹羣盜莫不望而膽落矣欽頌奚如似此情形常郡必已收復卽金壇丹陽亦不日可望得手無疑矣東壩業經麾下派八營令譚鎮調度駐守必大可以放心矣惟浙境竄出之十四僞王分股竄至甯國屬境勢必悉竄江右家兄日來非常焦灼蓋徽軍不能攔截痛勦深恐江右重受蹂躪而目下不能

撥兵援江所以大可憂也麾下已飭東壩溧水建平嚴加防範
定可穩守無虞第恐常郡竄出之賊亦係飛走局面仍是會合
上游大股入江亦未可知不知東建各營其力量能攔頭截擊
否麾下計慮審慎最善相機望常以上游之東壩建平在念苟
有可以痛加勦洗之處則乘機勦辦上游少去一股賊則江皖
多受一分之福家兄少一日之憂慮請勿以敝處單薄爲念弟
自度儘可支持也

復鮑春霆

日昨肅賡馳賀計達英盼頃奉捷書欣諭出奇制勝大敗賊於
茅山復擊敗丹陽竄逆斬獲以萬計遂於二十一日克復金壇

勝算奇勦令弟欽佩無已刻下餘孽由定埠往建平界竄去大勢皆趨重皖南甯境竄匪連日不至披猖否麾下以金壇地險易守擬照家兄前議交富將軍撥兵駐防已遵指函致安慶矣王峯臣來信謂丹陽業已攻克而昨晚接馮軍門函尙望雄師助剿似丹陽未經克復旌麾恢城愈多分兵愈遠又值蟻賊羣趨上游之時麾下用兵如神最能相度機宜酌量緩急或助丹陽或專顧上游爲家兄分憂諒麾下必有至當之法也

復富將軍

頃奉惠書欣諭兵甲胸羅機宜指授雄師南渡後掃蕩丹陽城外逆壘外援旣絕螳臂自難久撐捷書露布翹足俟之敝軍二

十五六日撲破朝陽門外兩月圍殪悍賊四百餘名鎗斃之賊尤多差強人意我軍勇丁傷亡亦百餘名所鑿地道十數處不知四月杪五月初能抵城根否比浙中潰賊悉竄皖南防師挫竄婺源不守賊勢悉流江西老巢未拔餘燄復張可勝焦灼弟惟日夜督率將弁勇丁竭力圖之盡吾力之能到以報 聖朝高厚之恩耳承示八卦洲地方係旗營官洲敝軍南字等營柴夫將已砍之柴硬行挑取用兵之地勇夫就近取柴不問業主似此陋習由來已久緣楚軍征勦以來除口分外別無米薪津貼之例取柴亦勢所難禁誠有如尊諭所云也茲准來囑八卦洲旗營兵丁如此之苦弟自應仰承德意同深體恤頃已通飭

各營將官傳示禁止長夫不准再至八卦洲挑取砍成之柴矣
弟謬統一軍每於愛惜苦民苦兵之處三令五申禁止騷擾惟
今年以來將近百天尙祇關得十五六天之餉弁勇窮苦不堪
饑潰堪虞間有不肖勇丁未能悉遵條約幸荷開誠布公見聞
所及先函指示俾得嚴懲以肅軍紀感荷舟誼曷有旣極矣

致駱制軍

二月中泮肅答一函計已早登籤閣陝中漢南已平霞仙中丞
擬先定秦境與雨蒼京堂會師河南爲一鼓聚殲之計劃下中
旂一股及西鄉餘孽已否肅清時以爲念多禮堂將軍攻克盩
屋受創甚劇已將欽篆交穆都護此公威望卓著西陲惟願調

治速痊共肩時局爲幸耳浙之杭州嘉興均已克復逋誅悍賊
悉竄皖南徽甯防師迎戰不利婺源被陷頃已流入江西死灰
復燃可勝焦慮鮑軍攻拔句容金壇家兄咨調蘇軍接守東壩
而騰出鮑軍上援江右冀可靖此狂氛但不知江蘇卽能撥軍
瓜代否也敝軍三月初薄城築壘開掘地道十餘處頗有爲水
石所阻者現仍朝夕趣工計四月杪五月初可抵城根二十五
六等日撥隊撲破朝陽門外兩月之圍軍士傷亡百餘人殫悍
賊四百餘名鎗斃之賊尤多差強人意惟久頓堅城餉源漸竭
糈臺所入每月不敷六七日之餉各營紛紛環索國荃雖勉爲
拊慰而寸心惴惴無時不以饑潰爲虞前荷師門逾格垂憐勸

捐接濟明知捐項清繳不易何敢瑣瑣瀆請而當此窘急萬狀士卒待澤之殷如大旱之望膏雨不得不再三陳乞於函丈之前惟冀早賜催集撥解俾饑軍得卽沾餘潤感荷曷極

復官中堂

十六日肅佈寸牋諒可郵呈籤閣頃奉十三日環諭捻逆豕突隨境經大軍斬獲無算躡擊棗陽一鼓殲滅可爲豫券又以漢中羣逆下竄策遣各部星馳剿截威弧所指貪狼銷芒正不第卽防鞏固已也金陵合圍後負隅依然初七日之役迄無成功現仍日夜派隊以驚擾之而一時尙難拔此堅城惶愧曷已蘇軍攻克宜溧家兄調鮑軍門所部進取丹句諒可乘機埽蕩上

竄玉山之賊經韓席兩軍擊敗旋繞竄金溪一帶敗殘餘孽惟祝迅就撲滅不至闖入腹地爲幸耳湘恒營新正月餉蒙飭糴臺惠給饑軍同深頂祝前復以請軍門慶衍及梁美材部下餉糴爲請實因饑潰堪虞不得不代爲陳乞諒蒙曲鑒也

致李中丞

十一日肅復寸牋諒可郵呈籤閣毘陵經大軍四面合圍攻拔諒在指顧宜深克復後計已鎮撫大定家兄檄調鮑軍門所部進規丹句與雄師聯絡一氣程方中轟攻禾城已破其郭而以城河太寬猝難鳧渡羣逆得負嶠死拒偷息孤城然亦不過旦暮之蟬蛸耳江西扼防之軍屢戰皆捷敗殘餘孽尙徘徊鉛山

金溪閒惟祝迅就撲滅不至蔓延完善地方爲幸耳敝軍初七夜之役迄無成功現仍日夜派隊以驚擾之並調金柱關兩營添紮太平神策兩門扼要處圍局已周匪穩固惟新正迄今尙未給餉尊處協濟一款前奉大咨緩至二月刻值米價騰漲各軍半以糜粥療饑呼籲之聲相環弟苦無以拊慰之惟有函懇我公飭糈臺早賜惠解俾久饑之士得以粗給口糧至感至叩

致劉中丞

二月中澣肅佈寸牋諒已郵呈行幄嗣奉簡門夫子來書悉漢中經雄師克復羣逆分股東竄勝籌擬先除中旂餘孽而以雨蒼京堂所部進剿西鄉會師河南爲一鼓殲滅之計指撝所及

刻日埽蕩關隴澄清中原引企捷音無時不盼露布之飛示也
抃祝曷極東南軍事蘇師於二月十八日攻克嘉郡浙師於二
十四日疊克杭州餘杭鮑軍於月之七日攻拔句容現已移師
進規金壇弟處迭次還攻而雉堞高堅羣酋據陴死拒梯衝苦
無可施展若竟堅持圍局以待其糧罄深慮城中麥熟又可久
延因於朝陽神策等門及龍膊子一帶增築二十餘壘開鑿地
道十餘處距城五六七十丈不等幸而有成數道並發固妙卽
有一二處鑿成者亦可竭力一轟但不知能如區區之願否也
上竄江右之賊聞已竄至閩界撫建屬境業經肅清江省現遣
軍躡剿若閩中更以重兵攔擊不難殄此游氛也尊處近日攻

取機宜若何祈示知一二是幸

致官中堂

疊覩軍報知卽襄頗有游氛窺伺經我中堂發踪堵剿各軍捷書絡繹想逆烽遠遁無煩西顧矣忻頌忻頌鮑軍克句容後二十一日克復金壇殺賊甚多吳越軍情前極得手近日浙境竄入皖南之賊爲數甚多徽防唐毛各軍出擊寡不敵眾竟爲賊所乘而浙江杭湖之賊續竄入皖者不少皖南固日形喫緊卽江右亦大慮其蹂躪死灰復燃爲禍不小實出意計之外也金陵所挖地道十餘處頗有爲水石所阻者尙未卜四月有一二處可以挖成否如天之福倘有好奇音卽飛咨冰案請中堂與家

兄奏捷也此閒軍心尙稱固結惟餉項奇窮爲入營來所僅見
湘恒兩營及蕭慶衍梁美材十一營亦盼餉甚殷國荃點金乏
術惟有求中堂俯賜垂憐而已又今年城中逃出難民婦女不
下五六萬人除有家可歸者資遣回藉外其無可依歸者尙有
六七千人不得不悉爲安置撫卹局內概歸劉守曾撰賑米以
活之兩年以來國荃用費已窮別無生財之法而撫卹一項經
費又刻不可少之費睹茲災黎垂罄之命彌深憫惻側聞中堂
在鄂垣諭捐撫卹難民之費月有常入之款局中收養婦嬰人
數尙不甚多計每月必多餘項夙仰中堂博施濟眾視四海如
一家伏乞俯念金陵城內逃出難民婦嬰之苦在於所捐吳中

爲官爲幕於鄂省者集捐撫卹項下酌量分撥二三成計每月可得數百串以濟此間撫卹之窮大雲普潤萬物皆春挹彼注茲惠而不費幸蒙允許求諭知盛旭人廉訪留意按月搭解俾蘇省喘息僅延之婦嬰多活旦夕之命功德無量專此瀆懇毋任翹企

復郭中丞

久不奉賜書正擬肅候起居適接月朔一函欣悉整飭捕務巨猾授首任勞任怨至於日晷不遑自古賢君慈父痾癢乃心何莫非此拳拳至誠以將其志氣而用吾胞與由此行之何事不修何政不肅公自言愚抑知聖人所謂不可及者正此而已粵

之難治本所稔聞不圖空乏亦與他處一轍以臆論之大抵他處籌餉重在開源粵省籌餉重在節流如所云方耀一軍者概可想見得一二年明察在上綜覈名實自必風移俗改矣承勛持靜守固無覩旦夕之功紉佩至言永以爲寶蘇杭先後奏績復以難易異形相慰厚意尤深弟頓兵堅城本欲獨當其難以牽賊之勢今願遂矣成敗天也遲速命也爲其所能不爲其所不能斷不敢以揠苗助長貽賢者之慮惟餉入過艱呼籲莫應兵士枵腹以得處彈丸如雨之地此則智者不能爲謀任之自然無可如何耳

復楊厚庵

頃奉來函惟金陵地勢瀕江一葦可杭四通八達現在得以合圍嚴勦水師之力十居八九卽往歲敝軍乘勝深入亦莫非恃水師爲後路故兩次援賊麕至敝軍與之鏖戰士卒晏然無恐是金陵之有今日局面繫麾下是賴況雪帥新去陝賊有東下之信一簣未成軍情萬緊尤藉威望爲之鎮扼在麾下智勇著聞自宜獨當一面若謂江右走死之游氛轉重於金陵久踞之魁逆而爲移緩就急之計竊爲蒙所不解麾下卽無賜函諄切辭免弟亦必仰體公盡之懷不忍棄垂成之局力爲畱挽況來書拳拳見囑敢不代達雅意以顧全局除將此地用兵必藉水師而水師得力悉由統將利害情形函咨安慶請奏外先此肅

復並抄呈季帥原片卽希台察是幸

致李季荃

十三日馳佈一函諒可卽達清睽頃展初十日惠書承示攻克常郡情形擒渠埽穴勞苦功高毘陵旣平丹陽亦相繼而下耆定偉績再造東南林慶曷極惟玉體有郤務望加意節宣珍重柱石之躬是爲至祝皖北戒嚴如故昨接吳竹莊觀察來函知丹城竄逆三萬餘人突入高淳境內湘後等營已出隊剿擊敗殘餘孽諒易驅除金柱關蕪湖一帶亦預爲戒備矣敝軍攻堅無術時深焦灼前乞分惠洋藥洋鐘等物以資戰守定蒙慨允惟前敵各軍專恃鎗礮轟擊請給者紛紛前函所請之數務求

卽日專弁飛速惠解洋藥二千餘瓶小銅帽百萬顆大銅帽三百萬顆是爲至要總以早到應急爲盼如麾下處所存有多則惠數多多益善契好如賢弟卽再三瀆告必不笑其爲無厭之求也茲特重瀆清聽並乞鑒原銜感無旣頃得富將軍信稱已奏明欲派數千人來此會剿金陵想朝議必允行知念奉聞

復吳竹莊

頃接昨晡手示敬承一切尊論以爲蕪邑不可無鎮壓之兵甚是甚是弟則更以爲髮捻之勢雖張相距究遠而南岸賊氛出沒甯國境上廣德復非我有金蕪兩防不宜盡撤頃皖中咨調金柱二營移駐西梁弟意欲擬稍緩乃移或從容於此間量撥

一二營往彌其缺當此勉強圖功之際官軍可勝而不可敗不得不穩慎以期無失尊見以爲然否麾下或先至無爲州城一看形勢須兵若干乃可守住然後拔營前往布置或尙不爲遲也

復官中堂

奉三月三十日賜函敬諭蕩節行邊指揮戎伍雄威所壓氛祲全消傾聽風聲莫名鼓舞髮捻諸逆繞過襄樊下趨隨棗尊諭所言耽視皖疆意在掣動下游兵力金陵有長江之險該逆勢難飛越惟皖楚之交日內當有大戰審度敵情有如指掌欽佩無似目下穎六廬巢一帶業經家兄嚴飭防堵滁和浦六渡江

各隘亦咨請厚帥扼守惟皖垣根本重地現兵太少該逆若由應山麻黃直走英霍半日卽達不無可慮幸雪帥戈船業已上駛陸兵聲勢藉以稍壯而逆踪流竄而下貴處必有尾剿之師庶不致過於猖獗耳浙杭捕寇接犯皖南人數不下十餘萬名酋悍曰或脫網而出以致徽防眾寡不敵有前月望後之魴賊知皖南荒殘已甚不能踞守遂大股皆由婺源南去家兄擬請蘇省之軍援防東句而令霆帥馳播江右兼撤皖防周軍門等之師先顧饒景有此數枝勁旅前往大約江右之賊不至蔓延他出矣秣城攻局如故開挖地道攻破月圍各情歷經函布並咨達冰案想蒙鑒悉至惟有祇遵教示以守爲勦免致功虧一

實以副盡懷而已承囑訪查馬姓當卽通飭各營一體遵照遇逃出難民並破城後逐一細訪倘有其人卽行咨送回鄂也

復惲中丞

頃奉惠函悉盡躬以肝脾失調清恙偶作旋服溫通之劑漸就平康機務多勞尙祈加意珍攝是爲至禱江西南豐未復新城之賊又由閩界竄回其續至德興及華埠者一踞沙溪一陷弋陽江省舊練暨新集之軍勢難制其豕突尊函慨乎其言洞鑒豫章情事家兄亦深以蔓延爲慮幸常丹克復江蘇撥軍接守東壩鮑軍已全部赴援上游冀可埽清餘孽至以湘陞與江右接壤囑意翁寄書家兄請楊厚庵軍門招勇萬人援江兼以固

湘自是通籌大局之至計但恐長江千里一時尙不可離厚庵
帥之師耳刻下偉略籌邊策遣各營分道防禦而整飭省垣守
備另募勁旅剿除土匪布置周詳細入無閒部民蒙福慶幸奚
如竄鄂之逆僧邸大創之於隨州斬馘數千旋督驍騎躡踪至
豫賊之竄往馬平港者復糾合應雲各股大肆披猖擾害及數
百里官節相已飭分道剿擊但願早日殲除不至波及皖疆則
大幸矣敝軍地道恐須五六月之交乃可抵城根前接富將軍
書已奏請派兵來此會剿 廷寄復命蘇師合攻弟棉薄之力
得藉各大軍佐助何快如之兵米自春迄夏招商採辦約計可
敷衍至七月底請另籌通變之法飭令截止米捐仍折銀兩

定蒙我公酌定章程矣感荷曷極運湘鹽艘卽日計可達岸黃
南翁知已由鄂上駛作何銷售均託此翁主持惟水程遼遠一
年不過一度不知能獲涓滴之利以濟饑軍否也承示致太常
函有合楚湘章省籌濟敝營軍餉之說具紉關垂厚意 中旨
命楚粵合籌太常舉以入 告蒙盛情擘畫挹注實多無任感
激戴君蘅香前已請其照料湘鹽矣劉南雲廉訪俟金陵竣事
當卽遵命促其帶十營回湘以供驅策戰守之事該司率該營
眞可靠也

復蔡少彭

頃尊使至奉到惠函遠荷殷殷注念並承厚貺多儀感謝曷罄

江右逆鋒漸斂鮑軍早抵江境楊厚庵節帥已泝流而上兵力
厚集定可一鼓削平贛水得身節扼鎮風鶴無驚列郡士民倚
柏府如長城矣弟軍地道爲城逆門穿者先後已十七穴餘已
無一可望者二十六日轟神策門外一穴僅塌外面數丈內垣
堅峙如故無可攀登夜間潛攻亦未集事三十日攻克太平門
外之僞地保城殺賊數百人隨攻矮城三夜傷亡精銳三四百
人總兵陳萬勝被火藥焚身王紹羲中礮洞腹均沒於陣二將
皆極得力失之可惜抑攻之難一至於此家兄疊次咨催李少
荃宮保來此會剿昨得少帥來書云長興於五月二十四日攻
克卽須親往湖郡會攻俟彼處克復乃來金陵不知七月間可

到否弟以一軍久頓堅城計合圍已五閱月矣但得將伯助予
早戴斯役詎非厚幸乃蘇師又爲湖州所牽惟有相度機宜以
竭區區之棉力而已竄鄂之逆聞徘徊於麻蘄之交捻逆飽掠
思歸髮逆有乞降之說果爾則楚北之幸亦皖疆之幸也

復郭中丞

前月之望肅復寸牋諒可郵呈籤閣頃奉四月二十九日惠書
敬諭盡臣匡濟銳意理財緡算經遴委長才釐剔積弊又於省
河設廠以便稽查比已日漸生色南海瓊玉之府商賈駢闐但
得統利權而一之徐徐整頓受之以漸持之以恆轉匱爲豐可
操左券至以種種積習欲驟起而更張之恆人之情難與圖始

漸摩既久則吏肅民恬翕然更化矣願我公優而柔之使自得之勿太激切勿過焦勞是所虔祝敝軍餉項自分去江右釐金窘急益甚蕭軍門部下索餉曲意拊循幸不生變厚承軫注感紉如何可言前函以勢處艱危又爲饑軍所迫措詞不免過激至疑公之不能相助愛我如老兄弟豈不稔知而猶鰓鰓過慮耶愁苦之言思之愧悚蒙惠解釐餉銀五萬兩枵腹之士聞之感激涕零祝延之聲相屬銘謝曷極江西宜崇陷後羣逆鼠伏不出勢已斂戢皖中水陸各師均已馳抵江境又得楊厚庵節帥爲經略廓清當易爲力湘省及棠圻有備無患邊境定可晏然竄鄂之逆徘徊於麻蘄之交捻逆則欲歸巢髮逆則思乞降

或不能爲大禍於皖也湖州要區現合蘇浙兩省之勁旅分道進攻埽穴期諸指顧至太湖賊氛早已洗蕩一空黃軍門率六營於前月來金陵留四營及李質堂所部足扼水路之衝矣胡令不遠千里而來地主之誼所不敢疏況爲鉅眼賞識者耶

致蔡少彭

前復一函計可郵達清盼比維駐節贛江列郡安堵際茲名將銳師雲集江右游氛淨埽指顧可期抃頌曷極金陵省垣於十六日午時攻克逆酋有乘黑夜假裝官軍衝出者聞報後卽派馬隊窮追據報沿途搜殺賊目及餘黨殆盡並擒僞列王供稱洪逆於攻急時吞金而死搜得僞詔一幅廣二丈四尺長一丈

六尺上載六月十四日四更歸天云云僞幼主於城破後有云
自投於火者亦有云逃出追殺者其餘各酋頗無漏網十九日
蕭軍門孚泗於追賊中生擒僞忠王李秀成長勝營朱洪章於
城內搜擒王次兄洪仁達當令降人及百姓辨認均稱的實不
訛弟親自審訊供與各酋大略相同此係著名巨魁東南士民
無不思食其肉已飛咨安慶商請處決之法矣弟棉力幹材賴
聖朝之威福天心厭亂得以勉戴斯役一切攻戰情形均詳抄
稿內藉紓注望殷懷楚北竄逆聞尙徘徊黃岡境內老巢旣破
逆膽當爲微寒不能覬覦皖境矣

復郭意誠

七月十二日奉到五月初三日手書藉聆一是第一軍久頓百計環攻幸於六月十六日克復金陵磔洪秀全之屍生擒僞忠王李秀成等酋先後伏法悍黨無漏網者差慰拳注惟效遲功薄方切內愧而昨奉 廷旨渥邀異數 天恩高厚實無可報稱祇益慙惶而已餉項積欠纍纍不得不乞憐於父母之邦前已縷懇閣下及南叟婉商中丞不拘何款籌備十數萬金俟勇丁假歸備文由東征局給發以免譁變一經鼎言吹噓諒必有以應弟之求也米捐改收銀兩量予便宜以招徠之尊議甚善衡州湘潭現已照時價變通此皆諸君子擘畫之力銘感如何可言袁萬泰運解之米當飭早爲量收以副諄囑惟兵勇撤遣

在卽昔以無米爲憂者今轉以多米爲慮耳江西崇仁經鮑軍
進攻克菴方伯屢捷於樂安之公陂盪定當易爲力幼帥用兵
籌餉均有牢不可破之見天下事處常易而應變難舉一廢百
昔賢所慮比聞明諭爲之喟然鄂逆初甚披猖近日毒骸似已
漸熄諒不至蕩搖皖疆矣筠仙中丞堅忍以有爲之才處粵東
可爲之地而格於同志之無人來函亦頗恨圖治之難進知緡
算已漸改觀大約承積弊之後漸摩浸漬必極之一二年之久
乃不能翕然更化耳

復郭意誠

十七日肅佈一函諒可卽呈台踈頃張佑之都轉來營接奉二

日二十九日手教具聆一是佑翁領懷慶劇郡卓著政聲當軸
乃以年老迫令解組微論未臻六秩去七十致仕之時尙遠卽
其精神矍鑠才識明練以之經世綽乎有餘握晤後頗深佩之
本擬屈居戎旃而佑翁駕至安慶時家兄已畱司鹺務此來擬
勾留數日卽回皖垣鹽筴爲餉糈所關敝軍亦倚賴長才矣克
城彙案自當如命但不知部中挑剔否米捐數月之間時勢迥
異不得不改折銀兩以濟偏枯厚勞次帥及諸君子盡籌感荷
曷極吾楚邊防未雨綢繆桑梓實受其福洋礮昨令縣丞魏彥
押解二百二十尊至湘已掛帆上駛矣

復惲中丞

金陵攻克前疊佈咨函諒蒙垂察日昨奉到六月二十七日惠示米價漸落自不能不變通章程以期踴躍自當如尊意辦理至於報銷則由尊處定章咨會家兄卽照辦也瑣瀆盡忱感激無極西省之賊鮑軍已得大勝厚帥與沈中丞會商分股剿辦軍勢頗張贛西可無虞竄擾鄂匪尙在羅麻一帶皖軍止辦守禦更無進剿之力 廷旨有命弟處分助兩省者惟積勞之後其氣已竭殊難赴調家兄昨已奏覆矣礮位諒日內已到湖北截留一百一十尊弟隨後卽當湊三百尊解呈尊處相與一家何勞齒謝賤恙蒙庇猶愈惟無功而受重賞旣切愧疚而不虞之譽求全之毀兩皆非意所圖交至沓來令人益切悚惕耳

致李中丞

月初肅答寸牋計已郵呈籤閣家兄於二十日回安慶擬九月初移駐金陵弟於善後各政未便越俎而各營五萬餘人聚屯城外營官哨官告假者紛紛因思遲撤一日則多糜一日之餉債臺之築從此將無了期因與家兄熟商將撤去二萬四五千入而酌留二萬六七千人爲遊擊之師及防守此間與金柱蕪湖西梁之用現擬將欠餉略少之二十餘營自八月初爲始陸續給資遣歸稍稍點綴計共需銀六十餘萬昕夕徬徨不知所措因思弟自頓軍石頭全仗我公高誼殷殷轉饋幸免饑潰藉收尺寸之效此時裁撤之費苟可他求原不應重勞挹注奈躋

踏四顧無能爲客軍代謀者計惟我公胸羅全局知弟最深愛弟最摯必能曲爲籌畫使之早日撤遣以節餉需茲特縷陳清聽務祈終始成全惠借銀二十萬兩卽由輪船運解以資支放俾各勇丁得以安帖歸鄉則頂祝盛德曷其有極弟一肩鉅任專待扛鼎之力隨時援拯當此善果圓滿之時尤望大雲垂蔭感禱奚如

致李中丞

頃奉大咨欣諭雄師於二十七日攻克湖郡奮蘇臺之虎旅將士皆飛掃苔水之狼氛機槍淨洗吳越數千里從此鏡清砥平耆定奇勳復乎莫尙復經策遣各部分道剿截凡皖浙錯壤之

餘醜定可翦滅無遺捷奏甘泉 一人有慶不第江浙士民額
手稱賀已也弟處裁撤十七營擬清給欠餉而目前所需數十
萬紛紛環索深苦無以應之前曾迭次函懇我公夙承摯愛諒
必有以濟弟之急禱盼曷極昨接安慶來咨以鄂中竄逆逼近
皖疆囑派劉臬司連捷朱提軍南桂所部十餘營馳赴皖南北
爲遊擊之師而弟處糈臺窘甚苦無一錢寸步難行何能遣之
過江寸心焦急萬狀窮之慮人一至於此良可嘆也江西大股
聞已有投誠之說湖州旣復則羣醜膽落其效順之意益堅肅
清定在指顧矣

復黃澤生

疊展手函碌碌未及裁答頃又以金陵之克遠荷貺書獎飾感
篆如何可言比諗文旌於七月初元旋轉瞬秋風桂子香徧楚
南名題虎榜笙歌鹿鳴定不作第二人想抃賀曷極朱春堂文
字大有進步兒輩亦漸知讀書之益皆由化雨沾濡所致駕回
時蒙頒以條約但能恪守謹遵卽無異親承講畫甚感甚慰石
頭城由地道轟破煞費移山之力僞忠王李秀成王次兄洪仁
達乃賊中之最凶狡者生擒而寸磔之差雪軍民之憤惟頻年
鏖戰百計環攻始獲拔此老巢收效之遲方深內愧乃承 恩
綽寵頒渥邀異數撫躬循省報稱爲難愛我者將何以策我耶

致李中丞

頃奉惠函欣諭大軍克湖郡後分路窮追解散禽溺以數萬計
黃文金鎗斃餘黨罕漏網者是堵逆一股業經剪滅無遺矣欽
頌曷極鄂匪初已竄入皖境弟處派劉南雲等所部馳往堵剿
比聞逆踪直趨英山以北皖疆或可無事足紓盡厯洋藥銅帽
尊處所存不多而仍許曲籌分惠感謝感謝此時不便專牘陳
乞也如尊處易爲通融或賜大銅帽五十萬小顆百萬藥四五
十桶以備急時之需拜託拜託前聞鎮營全撤求我公挹彼注
茲原因窘急萬狀恃愛而爲此請今知每月三萬本不能如數
照撥又因撤營時借款四萬須陸續彌補少緩數月乃可惠濟
敝軍具紉垂愛厚意惟弟月初先裁十六營以後尙須撤十餘

營但能早得鉅款即可早撤多營以節餉項未審盡籌另有通融之法否承示貴部與浙軍放餉情形同茲支絀弟久在窘鄉此中况味嘗之爛熟微軀濕毒未瘥益以心脾之疾怔忡不能成寐昨已咨請安慶代爲具疏乞假養病惟願 聖慈卽放還山實爲厚幸至柱石重臣 朝廷倚畀方殷江南蒸黎胥喁喁然相託以命秋風鱸膾之思幸勿輕宣諸齒頰也李秀成擒獲後弟徧刺以錐流血如注隨卽傳置檻車中後數日家兄來營提訊數次呈親筆供詞數萬言內有謂尊處關稅極多等語李秀成屢經雄師擊敗所陷江浙諸郡縣亦皆爲部下攻克積憤已久故作此詆毀之詞家兄忙中未及刪改弟則毫未聞及此

事至今亦未閱過一遍可想見其疏矣乞恕乞恕

復郭意誠

頃奉惠書猥以爵命濫叨獎借溢分循誦增愧此閒善後事宜如撫卹招徠留守各營布置分段均已次第料理中秋前以鄂匪東趨抽派劉南雲方伯等所部二十二營馳赴皖北作遊擊之師比聞逆踪直趨英山以北皖疆或可無事惟撤勇一節頗費周章月初先裁十六營所欠之餉已約核數目不過十五萬求次帥預爲籌備前次復函中曾縷陳之昨接安慶來咨擬半給銀錢半給期票弟因萬不能行故未之許也東征局俟弟軍盡裁後始行截止庶欠餉有清給之一日寸心爲之大慰湘捐

併入南捐量爲分潤旣省經費又獲實惠甚善甚感憶弟頓軍
金陵全賴次帥及當軸諸公殷殷轉饋有以玉成之克城後曾
面請家兄另具一疏敷陳湘省維持大局之高誼家兄亦深以
爲然今知次帥執爲不可任勞而不居功謙抑襟期令人欽企
靡已如弟之謬荷 寵榮者能無赭汗南翁公忠體 國及歷
年籌餉之勞家兄已面許弟九月十月專疏爲之陳明也此事
在南翁誠無心置之不過聊盡弟區區之忱耳文輔卿兄爲弟
舊交鹺務資其經理並得南翁暨閣下主持照拂自可斟酌盡
善專辦督銷之扎家兄諒必允給至保晉道員已與尊意不謀
而合矣崔春圃所圖不知長公可如其願否選鋒水師護解軍

火餉項各哨弁俟二次水師保案內必求長公彙獎以酬其勞
來單已存記矣微軀濕毒未瘥重以心脾之疾疲憊殊甚現擬
請假養病俟奉 諭旨後卽整歸鞭計冬月可啟行與諸知己
暢聚湘垣共浮一大白也

復丁雨生

頃展貺函承念敝軍裁營欠餉無可籌措許爲設法挹注卽解
金陵以應急需感甚慰甚申江百貨充牣以沙船爲大宗近因
輪船夾板往來便捷頗有一網打盡之虞尊意擬請李宮保具
疏入 告改復舊章非勤恤民隱者不能曲體及此關稅因分
見薄重以洋藥免單改歸天津宜其暫形短絀然以盡籌經理

廣爲招徠轉匱爲豐可爲豫券也家兄於上海設局勸捐實因
彌補欠餉不得不集資於閩閩劉方伯議舉行畝捐鄙意以爲
慮億萬窮黎不若慮千百豪商大賈以夙稱饒富之區得諸君
子鼎力勸辦登高一呼定可使河潤九里也無任企盼粵省釐
捐六萬兩蒙派輪船迅解感紉之至滬上協濟之項亦盼早爲
惠解鄙人近況具詳前函中茲不贅述

復富將軍

昨答一函計可卽呈籤閣弟一軍謬領無時不以擾民爲慮克
城後哀鴻滿目觀之惻然卽頒發告示招集流亡禁止兵勇不
准佔住民房及折毀房屋業經徧布條約三令五申意謂如此

嚴禁庶兵燹遺黎不至有絲毫之擾矣乃尊處傳聞謂仍有折毀民房者並有於本人歸認之時霸佔不准看視者果有此事實堪痛恨當卽傳集各營官親自查問據稟並無此事弟數日入城一次凡有不法者立卽斬決亦不見有此事而江北既有此傳言弟處自宜倍加禁約查敝軍八月之初已撤一十七營回湖南領餉昨接安慶來咨以鄂境之賊竄至英山蔣軍被圍並有擾及太湖屬境者勢甚披猖現已派劉臬司連捷朱提軍南桂洪章等所部二十餘營卽日過江馳赴皖北作遊擊之師其餘應遣散各營多住城外應留之營在城內亦皆分有汛地在城外者仍居營壘在城內者分守城垣壕口弟初六日已入

城暫住僞侍王府將於城上蓋蘆蓆屋數椽爲弟移居城上之計餘大約八月二十日後營哨官以及勇丁概不許住民房矣未得賜書以前已嚴飭密查確訪卽或有遊勇及隨營貿易之人擅違禁令夜閒偷取料木者亦立卽捆拿正法以示懲儆兩旬以來均係如此辦法但恐一己耳目終有未周幸蒙垂愛殷肫開誠指示俾得隨時稽察不負朝廷付託之重寸衷感激非楮墨所能宣此後清聽所及仍求詳細示知弟生平惟恐自蹈於有過而不自知閣下直道而行夙所欽佩尙祈惠教時錫箴規則責善之高誼益感紉於靡旣矣湖郡二十七日克復廣德州二十九日克復江西大股聞有投誠之說肅清定在指顧同

深額慶

復官中堂

頃奉環諭敬諭豹節移駐黃州發蹤指示餘逆迭次敗衄轉輾
奔竄闖入蘄水屬境現經飭令各軍合力勦擊以精銳之師殲
疲乏之寇廓清指顧驪頌奚如賤恙仰蒙垂注感何可言至勉
以忠盡尤感訓誨之殷國荃受國厚恩苟力可勉支方圖報
稱之不遑何敢遽作歸田之計第微軀自夏徂秋百病叢生困
憊殊甚不得不請假養疴幸蒙聖慈曲鑒准其解任回籍連
日料簡一切冬初即可掛帆南旋誦未有涓埃答聖朝之句多
病之躬自問良深悚歉耳湘垣等營餉項屢經肅函瀆求明知

鄂省邊氛未靖前敵之士轉潰浩繁在綽臺自應權度緩急奈各營窮窘已極環向國荃求索不能不勉徇將士之請代顓鴻施區區苦衷定荷中堂亮察也國荃擬於十月初一二帶四營及湘垣二營回湘遣撤如遇順風則中旬可趨謁崇階祇領訓誨耳

復竇蘭泉

頃奉手教敬諭旌從於六月初抵禹州擬勾留兩月起程北上乘茲驛路秋光蒲輪入覲敷奏彤廷爲國家策治安佐中興一人前席而諮百僚拄笏以聽斯誠天下蒼生之幸正不特曳星履登雲堦擢崇階爲交游光寵已也金陵百計

環攻僅乃克之竊以功薄效遲時深內愧乃荷 溫綸曲逮錫
之曠典撫躬循省夢寐交驚承勗以老氏功成名遂身退之論
非大君子學道有得而又極垂愛之殷者斷不能爲此言且斷
不肯爲此言而弟則萬不敢當此自念頻年戎馬於 國何功
於世何名而轉邀不世之殊寵受非常之厚恩方力圖報稱之
不暇更何敢輕言引退自博名高祇以多病之軀濕熱外注心
脾內虧偶一構思輒怔忡不能成寐不得已擬暫乞假養疴已
請家兄代爲具疏惟願 聖慈俞允俾得早賦歸田副知己之
厚意則大幸矣白門陸沈一紀之久元氣剝喪殆盡克城後撫
卹凋瘵招徠流亡災黎漸有復業者貢院已飭鳩工修葺十一

月閒可舉行鄉試惟裁撤勇丁欠餉累數百萬卽稍稍點綴已大費周章前因髮捻東趨擾及英霍弟處派兵萬餘馳赴皖北甫經渡江而逆踪已竄回豫境現今各營暫駐廬州聽家兄調遣其餘留防之軍分段駐守布置業已粗定閣下致安慶書中詳議善後之策必能得其要領舉而措之其嘉惠子遺者爲無窮矣船山先生全集開雕將半俟來春梓成當遵指寄贈也

復萬旂軒

昨肅一函計可卽達清睽頃承惠翰僞銀非尊處印封區區之數何勞介懷弟病體增劇定於十月初南旋敝軍續撤之營索餉甚急昨函已縷述之茲承惠解二批銀一萬兩其餘三萬兩

俟幢節望後起程時順帶金陵貝紉關愛之殷感甚感甚至三批之四萬兩月內知可收齊望囑陶鶴亭兄迅爲催集弟多病之軀急思回湘調攝而爲欠餉所牽一時無從擺脫專待已允惠濟之七萬兩解到即可給發各營戰士得有歸資鄙人亦釋此重慮私衷禱盼靡閒昕宵唯我公曲全之弟九月二十七八日即可登程也另解修理貢院經費一萬兩已飭善後局收存爲鳩工庀材之用矣

復劉同卿

頃奉賜函猥以金陵之克殷殷獎掖臨風莊誦感與愧俱國荃久頓一軍勉收寸效方以過多功寡譴責時虞乃蒙聖主隆

恩寵頒異數撫躬循省夢寐皆驚來諭復以攻城不假手西人
爲有當於盡慮受業硜硜之見旁觀者鮮不嗤其迂拘而獨蒙
師門之許可循循善誘俾後進知所折中明訓之啟迪者至矣
承垂詢善後事宜白門陸沈十有餘年元氣剝喪殆盡克城後
撫卹子遺招集流亡凡心力之所能及者無不與家兄勉爲擘
畫冀以蘇民氣而慰宸衷所憂者戶口凋殘勞來不易寸抱
時深跼蹐耳勇丁陸續裁撤以欠餉過多支絀萬狀連日又因
鄂境竄逆擾及英山並蔓延太湖之屬境勢甚披猖家兄來咨
囑卽派兵萬餘人馳赴皖北作大枝遊擊之師比已籌給行糧
遣令星夜渡江矣湖州廣德於七月杪次第克復江右亦一律

肅清餘逆有竄往甯都者聚殲諒亦易易捷音踵至良可抃慶
復李中丞

頃奉惠書江浙大定大軍卽擬減餽而慮欠餉之無措爲貧所
慮到處皆然真不知何日可了也敝軍蒙蓋籌挹注並催集閩
海關輪船經費藉濟勇丁索餉之急卽日得以續撤十營稍給
資斧感謝感謝洋藥銅帽承許如數分惠尤紉厚愛弟濕疾依
然怔忡加劇起居坐以艱難萬狀自問斷難勉支惟冀早日扁
舟歸里實爲厚幸回憶頻年戎馬非不思竭誠報國而輟材
棉力無補時艱重以多病之軀極圖引退致干聖主責問思
之慙惶至浙撫之任虛擁位號已覺頽顏况賤軀疲憊如斯更

何能躬親吏治區區求去之意實出真忱惟知己鑒之而已家兄於初七日至金陵貢院修葺將竣我公擬冬初啟節渡江主持科場一切事宜弟爾時計已早著歸鞭未獲一傾離懷悵惘奚如忠酋供詞情事多不甚確以滔天之元惡而自誇其忠主愛民之忱尤可發一大噓也

復李次青

湖口艤舟忽承蘭訊猥以秣陵之役渥荷殊榮潤古雕今揆張溢分反復循誦良用頽顏比諗黃門閒居萱堂禔福循陔之暇著書自娛名山偉業此爲不朽手著國朝先正事略知己爲成書閣下曠世逸才直輔子長之室惟願早付剞劂俾一代名

賢得藉龍門述作以揚聲來茲弟輩亦爭先覩之以爲快聞風
欣矚神與俱馳弟頓兵白門已越兩載師勞餉竭僅乃克之淹
遲如斯何敢言功乃荷 明堂策勳錫之曠典撫躬循省寤寐
交驚比以多病之軀遂上乞歸之疏幸承 俞旨准其解任於
十月朔日泛舟而南蒲帆風利計月杪可達星沙回憶頻年戎
馬艱險備嘗如在危濤簸浪中無時不驚心動魄一旦退閒鄉
井習靜養疴當可憑調攝之功收藥餌之效自顧癯瘠病鶴此
心已盟閒鷗來函煌煌大文漫相引重深慙建樹無奇不足副
鴻詞之揚挖如何如何

復惲中丞

舟次接奉惠書敝軍遣回各營所欠餉項業蒙厚意通融如數
清給歸田之士靡不頂祝鴻慈鄙人亦紉荷靡旣感謝感謝至
回湘之營皆因目下無餉裁撤故託以防邊爲名恐一言遣撤
則營哨官號令不行約束不住沿途三千里必且滋鬧不堪非
地方之利也弟過大通借得皖鹽數十票運湘售出充餉則可
悉行遣撤矣不敢希冀桑梓多籌一番養兵之費當時公牘上
借商定去留爲題者爲安眾心故耳玉班方伯奉滇臬之命
公將疏留之徐乃令統率所部埽蕩滇氛自是通籌全局起見
碩畫敷陳想已荷 聖明俞允矣弟以多病之軀獲遂歸田之
志於十月朔日由金陵起程途次疲憊萬狀一動一言均極艱

澀如此者兩旬昕夕靡閒直至武穴乃有轉機二十日行抵黃
州遇暴風大作沉覆勇船數十號幸未傷人而資糧衣履都付
洪流觀之心惻二十四日至武昌賤恙已愈十之六七惟隨歸
索餉者尙有數千人前曾函託南翁求我公力拯其急夙承摯
愛諒必有以應弟之求弟一路阻風十一月初四乃抵新堤上
游水涸計須十二乃可到省祇謁鈴轅面陳謝悃也

復李壬叔

三年睽教一紙傳書並得讀則古昔齋算學雖未能遽爾讀竟
而苦心精詣良足佩矣惟聞應召入都諏期已在春抄行見
籌畫區宇妙算匡時閣下之道必將大昌於當世不獨是書之

傳海內也承惠三十部甚感雅意弟非長於算學者未敢率意作序且來書亦必擇人投贈方不致聚蠶而鼓耳藏經之舉蓄意有年所以遲遲而浸以漸弛者特不得其佳本閣下能與惠甫才叔廣覓佳本惠寄後當商略集事也弟因夙恙未痊乞歸田里冬月二十日抵長沙杜門謝客冀可靜養而已

復劉省三

接奉十月二十七日手書欣悉壹是先是少帥函來已悉貴軍疊勝陣斃任逆聞者莫不鼓無時弟尚在鄂城迫交卸回湘後復迭聞東省勝狀昨知賴牛悍逆亦被麾下乘勝追剿悉數蕩平數年來中原巨患弭於一朝偉業豐功於今爲烈行見九重

動色五等開封是蒼生所共慶不獨爲麾下榮也現在暫從零
匪想皆畏威帖服永靖閭閻矣弟因病乞歸暫寓湘省靜養一
月尙未安舒惟逃聽佳音心神爲之爽豁耳

復趙惠甫

前日接冬月閒在漢口留函尙未及復頃復得臘八日手書並
佛書一單領悉種種文駕抵秣之後暨返珂鄉擬度歲除仍爲
出門計想見新韶映麗簪作日新曷勝企羨所示經論四十六
種誠如來書所云不必拘定全藏反以多而見滯卽此四百卷
梓行於時亦已增一千五百光明於大千世界矣竺典淪熄得
閣下挈而起之將使一切眾生出大火聚入清涼池較之銀龍

簡金塗塏其福德尤爲假普也竊計板片紙張湘省爲便工匠
宜取吳中人惟設局專刊內興雖立志自堅然不欲多聞訾議
祇宜開鑄經史而以釋家各種參互其中亦可次第刊竣閣下
到金陵後姑與張嘯山廣文商之或者歎侶而來嘯山總校儒
書閣下總校佛書成此法會亦佳事也至經費非鉅萬不可擬
約善男子百人各出二百金集腋爲裘可得二萬金雖非旦夕
可就然中秋前後必可得半明年夏秋可望彙齊書亦非旦夕
可成然必得兩君子允許主持此事乃可興工鄙人但稱作一
勸捐之人耳如蒙允許則請兩君子攜帶底本顧募手民南來
三四月間局設南嶽山之麓清靜幽閒不過三年則四百卷之

釋典與百餘卷之儒書均可告成如經費不敷尚可於善男子
百人之外多爲勸募總不至停工待餉耳倘兩君子不能拚三
年之力親來主持此事則鄙人諸事蒙昧亦不免望洋興嘆悔
而思返矣仍祈毅然任此艱難不憚煩瑣料理手民及校勘之
事則善果成於茲議矣兄自冬月底回南僑寓長沙藉便醫治
春寒尙劇所患未能遽痊併此附注

復陳舫仙

前月二十四日曾布數行郵報曉窗啟程之期想可遞達青覽
矣二月十二日接奉臘月二十九日手書詳覽之餘與兄前此
所聞者大同小異兵單寇黠致被竄遁而前麾下獨任其艱心

力交瘁 朝廷雖經置議亦知西陲之事端賴干城故有嚴防
西河之 命指曰逆氛消殄綜敘前勞不第光復故物已也麾
下現赴鄉吉一帶料理防守當早馳抵該處布置井然聞該逆
敗竄直隸近有遁至天津之說湘中路遠信稀未甚的確想李
少帥督率勝軍前往剿辦左帥將赴會合不難除此殘股也兄
仍屬湘省宿恙未痊

復陳舫仙

接奉惠書詳悉壹是貴軍以十二營防守千七百里辛苦兩載
心力交疲乃以冰結於前蠅營於繼雖曰人事豈非時運哉戍
邊之役遠哉遙遙來函冀擺脫此行入山養性閣下之所願亦

兄之所祝第不知果能擺脫否耳計二月二十四日發信迄今
又閱一月所有貴軍之事諒已接手有人左鄭兩公素知盡抱
必能體恤一切現計曉箇一軍就途已久抵晉之後諒可妥爲
位置曷勝懸念湘中信忌阻遲不知近來軍報但願張逆一股
早日殄除則左帥仔肩亦可稍釋耳兄息影家居瞬逾數月所
患未愈仍復日對藥爐自正月閒得尊處吉防之信懸系至今
殊爲悶悶諸望順時自愛靜俟泰來當自有無往不復之理也
臨穎馳溯

致何小宋中丞

十九日曾佈復函諒日內可登籤室茲有懇者弟兩年在鄂地

方一切事務抱疚良多幸賴諸君子指示多方實深銘感然念撫民之乏善總期補過以自安去秋鄂闡鄉試因人多號少應試者皆阻於錄遺跋涉關河嗒焉而返非惟其情可憫且亦弛其向上之心彼時同志諸君子卽有籌添號舍之意而弟以引退匆匆不遑議辦竊念此事惟閣下知弟抱歉之隱衷可以爲鄂增此盛舉用特專函奉懇務祈與遠帥耕娛方伯及早商榷興辦嘉惠士林目前鄂局發餉無多籌費較前略易且此舉爲本省鄉闡公事各屬勸集捐項亦復不致甚艱或先借用釐金隨後解捐彌補究應如何辦理之處悉仗大裁總期事必有成今年興工明歲落成爲善蓋錄遺所不取之人其中非無能手

而後起多讀書之輩此心共切相憐區區寸衷尙祈淵鑒

復王王秋

接奉手書如親晤語桂志業已脫稿史有三長必兼擅之剗剗歲事幸早惠寄以解渴思也省志行將開局此事全仗各郡邑志多善本則省志不勞而理顧安得秉筆者之悉如閣下哉弟以就醫故僑居會垣者逾半年所患稍瘥行將旋里竊謂屏車馬以養心性卽久留省下實亦無所不宜耳

復唐義渠

弟疆寄濫膺邊防時懷鄂中積習勢若治絲履任以來兵事餉事力思振作多爲時勢所格積重難返綆短汲深徒用焦灼而

已頃據豫省函報捻逆竄擾確山遂平一帶若由確南趨卽屬信陽州境若由遂西竄卽屬裕唐等境現飭沿邊各軍加意嚴備但新募不過一軍洋鎗馬匹急切俱未辦到整頓殊不易完善閣下任鄂最久前事之師尙望時錫機宜不遺在遠是爲厚幸

復翁玉夫

頃奉惠函祇領壹是承示桃源一案迭次嚴訊切實訪查具見仁人君子有德惟刑敬明乃罰之至意已將尊函抄示萬石臣軍門矣捻逆近竄至南陽泌陽賒旗鎮一帶距鄂之隨棗襄樊皆不甚遠日來警報頻聞弟已派郭子美軍門彭杏南方伯步

隊九營及選鋒等營無馬之隊千六百人由黃花滂進駐德安中權之地一俟洋鎗到日乃可前進隨棗一帶相機迎剿查擒逆大股現均合併齊皖至豫之汝陽皆無賊踪悉屬集於信陽南陽一帶路路與鄂偪近朝發夕至防不勝防惟有集重兵於扼要之地迎頭剿擊以求制勝之方而已知關肫注合併附陳

復李子和

接奉環章籍悉擒逆由徐犯豫經大軍悉力扼剿頓挫凶鋒現又策遣雄師乘勢痛擊旌旗所至氛祲全消盪定中原在此一舉西平功業將復見於今日矣近據各路探報擒逆由確山遂平擾至泌陽沙河店一帶若由泌陽直趨則隨棗當其衝若由

泌陽西竄則襄陽喫緊節節毗連朝發夕至弟已飛飭各路防軍嚴爲戒備布置戰守事宜如果捻逆大股全數入鄂弟卽親赴德安相機調度但甫經履任整頓尙未完善新軍到此尙未彌月洋鎗亦未到齊賊來如速不卜能得手否也鮑軍此次過境恰有機緣現小駐麻城如聞南陽泌陽之氛折回東趨則靈軍由光固橫出或可以扼其前如賊由隨棗而趨入鄂之腹地則鄂軍以一枝躡其後有靈軍攔頭亦可收夾擊之效渠軍所請一切猥荷俯從感同身受蒙派士薌觀察親到商城開創糧臺從此靈軍入豫得所依倚春霆便可一心勦賊不以餉事分心惠莫大焉

復朱星檻

前佈覆函計登英疎頃接來翰領悉捻逆擾及西平賈魯河雙廟一帶貴部出師樂安一月三捷似此痛快無難聚而殲旃聞之曷勝狂喜僕昨接江良臣軍門函報該逆於本月初六七日竄至新野屬之青花穰東火星廟拐子渠等處構林關東之古城一帶亦有賊蹤計由新野西趨襄樊首受其患若從新野直竄隨棗卽當其衝相距俱不過百餘里可以朝發夕至且據難民供稱實有垂涎鄂邊之意現檄郭子美所統各營進紮隨州之唐縣鎮熊岳峰軍門所統各營進紮應山縣之廣水驛彭杏南方伯所統各營暫駐德安看賊勢趨重何處再拔幟前進會

商勦辦其棗陽則舊有唐道協和各營隨州則添劉鎮維楨七營以資會勦其樊城舊有江軍門各營各隘防軍佈置已定但新軍爲數無幾馬步亦未到齊舊營能否可恃尙難預定耳僕近患熱症擬將署中一切檢點就緒卽親赴德安相機調度藉與諸君游擊之師聯絡一氣批亢擣虛以收合勦之效雄軍與劉張李三軍門聲威方著所向披靡將來必可助鄂省會勦之力也鮑軍因更換鍋帳在黃州小駐旬日現將由黃安前進昨據伊函一俟車輛辦齊卽可一戰僕又已函催之矣知念并聞

復趙初賓

隨州營次奉到華函備蒙獎飾戈匪蠢動勢甚岌岌閣下舉行

保甲將以實意法良意美清源塞流保全桑梓功莫大焉令兄
貴恙未痊南省營務得閣下相助爲理從此長城之寄閤省賴
之又不獨吾邑也弟前因捻逆銳意圖鄂偏近邊陲於七月二
十六日出省視師檄飭各軍嚴陣以待方擬上下夾擊會圖聚
殲詎捻狡黠靡常聞風遠遁於本月十六日由朱仙鎮東竄家
兄現駐周家口仍飭各軍跟蹤追剿弟由德安啟行現到棗陽
卽日前赴襄樊察看仍由水路回省料理餉項將來再至黃州
麻城布置東路防務也知關肫注并此佈聞

致郭子美

前泐覆函計登英盼頃上官今寄來華翰備聆種切米珠薪桂

時事大難麾下竭力經營籌畫良苦棗陽辦米一項將餉銀按數截畱清欸想可辦到襄樊辦米敝處前已札飭張丞之淵想可賒得若干隨時接濟也其分局之銀錢並無應解省局之項不能就近撥扣伏乞原諒騾車之用其益無窮本以趕緊購買爲妙惟近日餉絀萬分如銀未到則請緩緩購買俟銀到乃買可也二尊洋鎗二百桿此時想已解到矣洋鐘洋藥等項卽日當催解前來也以後軍裝子葯餉項均應由易晴谷觀察丁中和太守局中認夫運至棗陽前進營中之夫不過派一天爲度過遠則萬不能也麾下墊用之欸過多其應領者望早備牘咨會敝處卽當飭局照發也前所議之統領費係照鄂章原定未

免過少以致麾下墊付多金具見顧全大局公爾忘私欽企之至至荃方倚麾下爲長城西路戰勦之事全賴麾下一人將來尊處墊欵荃必當設法彌補斷不忍獨累麾下特以目前萬分支絀銀米一切皆不能應麾下之手荃不特慚愧並心急如焚然辦理數月之後必有充暢之時方可以對仁友也刻下捻已回竄志在犯鄂頃已咨會冰案祈查照施行朱賢來所解之洋鎗近日卽由水路襄陽分局解唐縣也荃於初十日在樊川解纜十八日安抵鄂省定於二十六日復出省城巡視黃安麻城佈置東路迎勦之事尊處想又須餉甚急卽日當湊欵起解前來以慰肫念并望隨時草示近狀及豫中軍情賊情爲荷

復鮑春霆

樊川營次飫領塵談別後懷思與日俱積頃奉惠書籍悉大嘉
已抵新野荃初十日解纜十八日抵署一路平適堪慰錦懷頃
報捻逆回竄蘭考將以全力窺犯鄂邊荃卽於二十六日親赴
黃安麻城一帶佈置東路迎勦之事麾下威軺由南呂魯山遮
截迎擊捻必橫竄犯鄂倘能入網羅之中靜候大兵前來則聚
殲可期矣李小軒函內則無他語但望麾下早爲拔營速爲奏
咨以慰宸衷云云今大旆已入豫省廟堂之欣喜可知矣頃
接中堂飛咨云貴軍暫不到周口所有江西八月分之七萬兩
江蘇之二萬兩已飭總局由陸路運至襄陽探貴營之所在速

爲解到祈派員迎提爲荷

復郭子美

昨復一檄計可卽達英盼頃展初七日貺翰悉以隨棗襄陽道
府牧令來牘均稱捻氛偪近亟應設防卓見慮師行少緩卽有
搶扼不及之勢已於初八日統率各營馳赴唐縣鎮伍雲浦亦
定於初九日開行計日內可先後到防昨據探報舞泌捻股已
竄至南陽及唐縣新野等屬新店瓦店一帶均有賊踪搖足卽
入鄂境今得大將刻期馳往扼要駐守實於邊防大有裨益抃
慰曷極惟秋日烈烈諸將率士卒冒暑遄征途次塵勞良深繫
念尙望仁友格外珍攝玉體是爲至要靜俟賊至相度形勢謀

定相准之後痛加勦擊以後便可迎勦而解矣賢友謀勇兼優自有穩慎制勝之策無待鄙人之遙爲規畫也能岳峰應卽日拔赴應山之廣水驛杏南方伯來信亦謂遇有緊報卽行親率數營赴尊處會商共勦官相意欲派劉維楨七營譚仁芳五營紮至河南之唐縣事屬可行兄已允許矣大約明日備文八月初間該營可到如此則西路之兵厚而又厚矣荃俟玉連美霖敬制六新營到亦可親率至德安居中權之地聊爲各路之聲援不可無重兵以駐之也玉連美訓練旬日之後卽令其赴尊處以歸畫一李宮保處昨由輪船解到來福洋鎗五百桿據來函謂精堅異常火力可及六七百步之遠荃擬卽發該三營何

如如尊處急需此項則望寫信示知或分半解尊處而以一半
給連玉美三營備用亦可洋鎗平日操演固是土藥漬以汾酒
至臨敵用藥亦是此物此間一刻實辦真洋藥不來千萬乞原
諒爲禱